

- S A M W E N S A V -

Man pa sav ki koté nou ka alé, sa dèmen ké pòté
Man pa sav la listwa-nou ké rivé, tou sa nou pé fè sé espéré
Nou lé kwè lavenir-nou ké pli bel, kwè kè nou pa tou sel
Nou ka bien wè sé an lespwa ki frajil
Kon si nou ka dansé anlè an fil
Nou ka bien wè lorizon pa two klè, san limiè
Nou ka santi nou fè an pil lèrè, mé mwen lé di'w...

Sa mwen sav lèw bò mwen, lè nou men dan lanmen
Nou pé asiz anlè twa Latè-a pou simen vag lanmou asou yich-nou
Sa mwen sav, wou é mwen, sa pé méyé dèmen
Si nou préféré dousè é tandress, poézi lavi pou fè chimen-nou

Nou pa sav la tou sa ka menmen nou, mé tout andidan nou
Nou pa lé kwè sé lajan selman ki pé anpéché maléré trapé gwo tjè
Pas ni lanmitié, ni lanmou, ni bel pawol dan bel chanté
Ni larouzé bonmaten asou bel flè, wi mwen lé di'w

Sa mwen sav si'w bò mwen, si nou men dan lanmen
Nou ké volé pli wo ki mové van, la nou pé santi nou bien vivan
Sa mwen sav, wou é mwen, sa ké méyé dèmen
Volé dèyé soley, bò zétval, la ayen pé ké sa fè nou mal

Sa mwen sav sé kè mwen pa sav ayen
Pa sav si tout lè sa mwen ka fè bien
Mé man paré ba'w tousa man pé
Pou nou touvé lamanniè pou divini-nou kléré...
Man anvi sav...

Sa mwen sav si'w bò mwen, si nou men dan lanmen
Annou volé pli wo ki mové van, la nou ké santi nou bien vivan
Sa mwen sav, wou é mwen sa ké méyé dèmen
Séré dèyé soley, man anvi sav, si ni sous a lanmou, mwen lé sav
Mwen lé sav...
Si ni sous a lanmou, mwen lé sav...